

MEMORIA XUSTIFICATIVA DO CONVENIO DE COLABORACIÓN ENTRE A CONSELLERÍA DE PRESIDENCIA, XUSTIZA E DEPORTES E CONCELLO DE VILAMARÍN PARA A EXECUCIÓN DO PROXECTO DE CONSTRUCCIÓN DE PAVILLÓN POLIDEPORTIVO EN VILAMARÍN

I. Departamento que tramita o convenio

A Consellería de Presidencia, Xustiza e Deportes é o departamento ao que lle corresponde a elaboración, proposta e execución da política do Goberno galego en materia de Administración Local, de conformidade co previsto no Decreto 136/2024, do 20 de maio, polo que se establece a estrutura orgánica da Consellería de Presidencia, Xustiza e Deportes (DOG núm. 101 do 27 de maio).

II. Antecedentes

1-A Xunta de Galicia, a través da Consellería de Presidencia, Xustiza e Deportes, ten previsto asinar un convenio de cooperación co Concello de Vilamarín para a execución do proxecto de construción de pavillón polideportivo en Vilamarín, que abrangue os anos 2026 e 2027, cunha duración que abrangue dende a súa sinatura ata o 31 de decembro de 2027.

O Decreto 136/2024, do 20 de maio, polo que se fixa a estrutura orgánica da Consellería de Presidencia, Xustiza e Deportes, é o departamento da Xunta de Galicia ao cal lle corresponde a elaboración, proposta e execución da política do Goberno galego en materia de Administración local.

Os artigos 194 e 195 da Lei 5/1997, do 22 de xullo, de administración de Galicia, establecen que, no que atinxe ás relacións coas entidades locais galegas, correspóndenlle á Xunta de Galicia ás competencias de cooperación e colaboración, podéndose estas materializarse mediante a subscripción de convenios.





Segundo dispoñen os artigos 25 e 26.1 da Lei 7/1985, do 2 de abril, reguladora das bases do réxime local, e 80 e 81 da LALGA, os concellos deberán prestar á súa cidadanía os servizos públicos que contribúan a satisfacer as necesidades e aspiracións da veciñanza, entre os que se atopan a promoción do deporte e instalacións deportivas e de ocupación do tempo libre.

III. Finalidade

Para os efectos sinalados, tense previsto formalizar co concello de Vilamarín o instrumento convencional a que se refire a presente memoria, cunha duración que abrangue dende a súa sinatura ata o 31 de decembro de 2027.

IV. Obxecto do convenio

Este convenio ten por obxecto fixar as liñas de colaboración entre a Consellería de Presidencia, Xustiza e Deportes e o Concello de Vilamarín para a execución do proxecto de construción de pavillón polideportivo en Vilamarín nos anos 2026 e 2027.

V. Fundamentos do convenio

O Concello de Vilamarín dispón de diversos servizos a prestar a poboación, entre os cales están os sinalados no artigo 25.1.l da Lei 7/1985 de 2 de abril de reguladora das bases do Réxime Local, así como o artigo 80.2.n da Lei 5/1997, do 22 de xullo, de Administración Local de Galicia.

Dentro do territorio do Concello, o pavillón polideportivo que se pretende construír, situarase no Parque Empresarial de Vilamarín, na parroquia de Tamallancos, situada no extremo sur do Concello. Coa elección da localización do pavillón, o Concello quere aproveitar a sinerxia que provocan os centros de traballadores que a diario se desprazan ao Parque Empresarial de Vilamarín e a súa situación xeográfica, mais próxima á cidade de Ourense e lindeiro coa estrada nacional N-525 (Benavente - Santiago).

O crecemento da oferta deportiva, á hora de formalizar un abanico mais amplo de





posibilidades choca de bruços cun problema: a falta dunha gran instalación deportiva cuberta para a súa práctica. Este feito provoca que moitos veciños de distintas idades, se vexan obrigados a desprazarse aos concellos lindeiros para poder realizar actividades deportivas nunha instalacións pechada, dada a nosa climatoloxía que dificulta a súa realización ao aire libre en numerosos meses ao longo do ano.

Coa construción deste polideportivo, o Concello pretende estimular a práctica de actividades físicas e deportivas na sociedade, para o que se queren poñer en marcha novas escolas deportivas e formación para toda a poboación, xente nova e maior, e atraer incluso a poboación da propia cidade. Por iso, a elección da citada localización no Parque Empresarial de Vilamarín, que como se expresou con anterioridade, pretende fomentar e achegar estas actividades ao sector da poboación mais amplo posible.

A construción do pavillón polideportivo, continuaría a senda iniciada polo Concello de promoción das actividades deportivas e daría un gran impulso ao desenvolvemento desta bisbarra.

Na actualidade, o Concello de Vilamarín conta diversas instalacións destinadas ao deporte: unha sala de musculación con espazo para actividades dirixidas, onde oferta con grande éxito, actividades dirixidas con monitor, como pilates ou ioga, unha piscina municipal de 20 metros (ao aire libre), un campo de fútbol de herba artificial con bancada cuberta, pista de tenis, pista de pádel e diversas pistas ao aire libre de fútbol sala e baloncesto nos núcleos de Agromaior, A Pena, Tamallancos, Bouzas, Sobreira e Borulfe. Ademais no concello sitúase un club de hípica que está xestionado pola Deputación provincial.

Coa intención de formalizar o impulso das actividades deportivas, exposto anteriormente, o Concello de Vilamarín está a deseñar un PLAN ESTRATÉGICO DE APOIO AO DEPORTE, con profesionais do sector que establezan as directrices para o desenvolvemento das actividades deportivas e a xestión das instalacións, a curto e medio prazo. Con dito plan preténdese establecer uns obxectivos marco, que sexan o punto de partida para definir posteriores estratexias mais específicas e detalladas, que aseguren que todos os esforzos e recursos implementados a partir de agora estean aliñados coas seguintes directrices comúns:





- Promover a saúde física e mental, incorporando actividades destinadas a mellorar a condición física e benestar xeral da cidadanía.
- Incentivar a mellora das relacións interpersonais a través do deporte.
- Fomentar valores como a disciplina, o respecto e o traballo en equipo.
- Ofrecer alternativas ao ocio nocivo e axudar a previr comportamentos de risco.
- Impulsar a integración social a través do deporte con actividades dirixidas a persoas con necesidades especiais.
- Fomentar a equidade de xénero, potenciando a creación de equipos femininos en diferentes categorías e modalidades.
- Impulsar o aumento da participación infantil e xuvenil en actividades deportivas organizadas, coa creación de escolas deportivas e actividades ligadas a diversos colexios.
- Fomentar o turismo deportivo e sostible, coa realización de torneos e probas deportivas que brinden a oportunidade de competir contra opoñentes diversos e condicións complexas.
- Organizar actividades destinadas á busca de novos talentos que poidan representar á comunidade en eventos deportivos, e nos que a poboación poida ver un referente de cara ao seu futuro.

Para a implantación con solvencia e viabilidade dos obxectivos fixados polo Plan, o Concello de Vilamarín presenta un gran problema de espazo, que impide seguir ofertando novas actividades, se non se dispón de novas infraestruturas. Na actualidade as actividades que mais éxito están a ter entre os veciños son as clases dirixidas, que se practican no ximnasio nunha área delimitada para tal fin pero entre as máquinas de musculación, o que provoca moita acumulación de usuarios nun espazo moi reducido, unha difícil xestión do monitor de varias actividades ao mesmo tempo e interferencias e molestias entre diferentes monitores e alumnos.

Enténdese polo tanto indispensable para a formalización dos obxectivos que o concello pretende implementar no ámbito deportivo, a construción dun pavillón polideportivo pechado con dimensións adecuadas á normativa deportiva vixente, que posibiliba as competicións deportivas reguladas e que permita ampliar a oferta de actividades a





brindar á cidadanía con mais disciplinas ao longo de todo o ano, feito que as actuais pistas ao aire libre non posibilitan.

Dentro da nova oferta deportiva, dende o Concello considérase esencial, a creación de diferentes Escolas Deportivas en diversas disciplinas e dirixidas a diversos grupos de idade, que impulsen a participación infantil e xuvenil no deporte. E que fomenten significativamente a creación de equipos mixtos e femininos en diversas categorías.

Ademais, a escaseza de escolas deportivas na zona, está a ocasionar que moitos nenos se teñan que desprazar a outros concellos para practicar o deporte que elixan, por exemplo o fútbol sala, ou que non poidan permitirse ditos desprazamentos e deixen a práctica deportiva. Créese firmemente que a creación de escolas deportivas, axudaría moito á comunidade de Vilamarín e aos usuarios que veñan do resto de concellos, a fomentar o deporte grupal nos mais pequenos e pequenas.

A creación dun gran pavillón pechado con materiais de alta calidade sobre todo no puramente deportivo, destacaría en moitas federacións deportivas para a realización de fases finais de campionatos de calquera deporte, atraídas por unha actividade deportiva a realizar en condicións mais sostibles, modernas e acordes cós requirimentos da sociedade actual. Este feito faría crecer moito ao concello, e potenciaría a actividade comercial e de restauración da zona.

En resumo, a creación dunha gran instalación deportiva é sumamente importante para o crecemento do concello de Vilamarín e todo o que implica, crecemento de negocios, creación doutros novos, crecemento da poboación. Xogando un papel clave no aspecto social do concello, non só como centro deportivo, senón tamén como punto de acollida e apoio á comunidade e como aposta estratéxica para o seu futuro.

A construción do novo pavillón polideportivo non só mellora a infraestrutura deportiva do Concello, senón que tamén actúa como un motor económico, xerando beneficios comerciais significativos. Con este investimento preténdese fortalecer o comercio local, aumentar a atracción turística e mellorar a calidade de vida da cidadanía no entorno da área de influencia do Concello de Vilamarín. Beneficiándose del non só os habitantes do municipio, senón que o seu impacto estenderase a unha escala maior,





dada a pouca distancia que o separa da cidade de Ourense.

É relevante destacar o impacto económico positivo que a instalación do pavillón polideportivo pode traer. Esta infraestrutura non só representa un avance en termos de equipamento deportivo, senón que tamén se erixe como un elemento dinamizador da economía desa zona.

O importe total das actuacións a realizar ao abeiro deste convenio ascende á cantidade de **un millón catrocentos mil euros (1.400.000 €) IVE incluído**, segundo a memoria detallada e valorada que se xunta como anexo I ao convenio, que se fará efectivo durante os anos 2026 e 2027.

Na actualidade non hai ningunha convocatoria en concorrencia á cal poida acollerse este proxecto nin se prevé nas próximas datas.

A falta de recursos dun concello pequeno para poder acometer as devanditas actuacións, nun marco orzamentario restritivo, de austeridade e control do gasto público, e necesariamente estable por imperativo legal para as entidades que integran a Administración local, configura un contexto do cal se derivan, entre outras consecuencias, a imposibilidade para o Concello de Vilamarín de afrontar en solitario os compromisos económicos que a execución das actuacións obxecto de subvención, representan para a Facenda local.

Así pois, este convenio de colaboración responde ao interese público e social que representa a acción de fomento da Consellería de Presidencia, Xustiza e Deportes respecto da execución dunhas actuacións necesarias para o normal funcionamento da entidade local, que lle permitan exercer as competencias e prestar os servizos que a normativa básica en materia de réxime local lles atribúe aos concellos, como Administración máis próxima aos administrados.

A colaboración da Xunta de Galicia neste investimento ven xustificada por ser o fomento de deporte tanto a nivel deportivo como a nivel saúde un dos eixos de actuación da propia entidade.

Conforme co establecido no artigo 26.2º da Lei 9/2007, do 13 de xuño, de





subvencións de Galicia, faise constar que neste convenio non son de aplicación os principios de publicidade e concorrência pública, xa que o obxecto do convenio é atender as circunstancias específicas dese concello para a mellora das infraestruturas municipais.

Incorpórase ao expediente declaración xustificando a imposibilidade de promover a concorrência pública, de acordo co establecido no citado artigo 26.2º.

VI.Importe e aplicación orzamentaria

O importe total das actuacións a realizar ao abeiro deste convenio ascende á cantidade de **un millón catrocentos mil euros (1.400.000 €) IVE incluído**, segundo a memoria detallada e valorada que se xunta como anexo I ao convenio, que se fará efectivo durante os anos 2026 e 2027.

Para dar cumprimento aos obxectivos deste convenio a Consellería de Presidencia, Xustiza e Deportes, a través da Secretaria Xeral Técnica, achegará a cantidade máxima de **seiscentos setenta e catro mil euros (674.000 €) IVE incluído**, con cargo á aplicación orzamentaria **05.01.121A.760.0, código de proxecto 2015 00088**, distribuída do seguinte xeito:

- Ano 2026: 132.000 €
- Ano 2027: 542.000 €

Esta cantidade representa o 48,143 % do orzamento total do proxecto que constitúe o obxecto deste convenio.

O concello de Vilamarín, achegará o **16,693 %** do importe total do proxecto, que ascende a **douscentos trinta e tres mil seiscentos noventa e oito euros (233.698,00 €) IVE incluído**, da correspondente partida dos seus orzamentos, distribuída do seguinte xeito:

- Anualidade 2026: 52.000 €
- Anualidade 2027: 181.698 €





O Concello de Vilamarín manifesta que ten concedida unha axuda da Deputación de Ourense polo importe restante, que supón o **35,164 €** % do total do proxecto, é dicir, a cantidade de 492.302,00 €.

Polo exposto, considérase xustificada a utilización do instrumento convencional para articular as actuacións de referencia, quedando o dito convenio fóra do ámbito de aplicación da Lei 9/2017, de 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/23/UE e 2014/24/UE, do 26 de febreiro de 2014 con independencia de que, ao abeiro do previsto no artigo 4 da dita norma, lle sexan de aplicación os principios desta lei para resolver as dúbidas e lagoas que se poidan presentar.

Santiago de Compostela, data da sinatura dixital

O secretario xeral técnico

Francisco Javier Abad Pardo

Por suplencia (Decreto 136/2024, do 20 de maio)

A vicesecretaria xeral

Vanessa Cal Ríos

